

CARTA JEE NI TEE SAN JUDAS

APOSTOL NUU ÑAYUU CACANDIJE

¹Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó lí rō nuū yā jeē cácuu ró ñáyuu manī yā jíín. Te Jesucristo ndíto vāha ya rohó jéē cáyihī ró ndaha ya. ²Te ñúhun ni rī jeē na cúndáhú gá ni yā rohó, te sáha ya jeē coo ndeyí coo siī ni rō, te coo manī ndasí yá jíín ró, te na ndúcuehē gā tāca jéē yáha núu rō.

Siquī tēe cástéén jnūhun stáhú

(2 Pedro 2.1-17)

³Ñánī mánī, yōhyo ní cuu ni rī tee ri nuū rō siquī jnúhun ni jnama ya rohó jíín rúhū jijnáhan yó. Te ni jini rī jeē cánuú gá tee ri carta jeē stihví ni rī rohó návaha nducú ndéyí ró jeē ma cási ñáyuu nuū jnúhun cácandije yó. Te jnūhun ún chi je ni jēhe ya iin jínu-ni nuū tāca ñáyuu maá yá. ⁴Chi sava tēe ni castáhú de róhó ní quívicoo de mēhñu ró. Te tēe ún chi nde jenahán je cáhán tutu iī jeē jnahnú ndetū de siquī jniñu cásaaha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān

de. Te tu cájejnúhún ndije de Jitoho yō Jesucristo jíín Yaā Dios, jeē mañúhún-ni ya cujéhnú nuū yō.

⁵Te vijna chi vēsú je cájini vāha ró, te cúni rī jeē na núcúhun ni rō ndese ni sáha máá Jitoho yō. Chi ni jnama ya ñáyuu Israel jenahán, ni chindéé ñájnáhan ya i jeē ní jinu i ini ñuu tatú Egipto cuahān i. Te vēsú súcuan te cuéé gá te ni snáa yā sava i jeē tu ní cácandije i. ⁶Te suni nucúhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihyū yā jijnáhan, te cándetu nde quiiji quiví cáhnu jeē sándaā yā jniñu. Te cánuhni jíín cadena, cáyūcu ní cáni nuū cunú núu néé. ⁷Te suni ni stóho ya ñáyuu ñuu Sodoma jíín ñuu Gomorra jíín sava ga ñuu jeē ní iyo yajni, chi suni ni casáha néé i nájnūhun ni casáha tāca ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihīn i castigo ñuhūn jeē cayú ní cáni, te súcuan cúu i iin ejemplo nuū ndihī ñáyuu.

⁸Te tēe cástáhú jeē ní quívicoo mēhñu ró, vēsú cájini de jeē súcuan ni sáha ya, te cájeni cáhá ni de, te

cásaha jnéhén de yiqui cúñu de, te cásquéhichī ni de tēe cándacu jniñu Jitoho yō, te cácahān ndevāha de siquī tāca jéē cácujuhēnu nuū sucún. ⁹Te nasūu súcuan ní sáha ndajéhé Miguel, vēsū ndajéhé cujēhu ga cúu ya. Chi tu ní cáhān ndevāha ya ni tu ní ndácunehen ya cuēchi siquī jexeén ná ni casásáhān jnáhan ya jíin jéxeén un jeē siquī yiqui cúñu Moisés ná ni jihī de. Chi suhva-ni ni cahān yā: Máá Yaā Dios, Yaā cúu Jitoho, cuxeēn yā nuū rō, ni achi Miguel. ¹⁰Te tēe cástáhú yáha chi cácahān neé de siquī tāca jéē tu cájēcūhun ni de. Te tāca modo cánevāha de siquī jeē sá cáa de, nájnūhun quitī yúcú jéē sá cáa tī, suu yūcuan sáha jeē jnahnú ndetū de.

¹¹Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácuñi de nihīn de xūhún te cástéén de jnūhun stáhú, nájnūhun ni sáha Balaam. Te jnahnū ndetū de nájnūhun Coré, tēe ni jihī siquī jeē ní cunihni ni de. ¹²Tēe yáha núu cándutútú de jíin ró jeē cáyeji manī rō, te cásaha de jniñu cúcanu rō. Chi cáyeji cájihī sīī ni de, te tu cásaha de cuenta ndese caji inga ñayuu, chi máni máá de ndíhvī ni de caji vāha de. Te cácuu de nájnūhun vicō ichi jéē stechí táchi. Te suni cácuu de nájnūhun yujnu jeē tu jéhe ndehē maá tiempo. Te cácuu de nájnūhun yujnu jeē ní quenda nde jíin yoho, te tú cuitī gā na modo nane numa. ¹³Te nájnūhun jeē jisó cóyo ndute mar te cáne tiñū, súcuan jícu de jíin jniñu neé jéē cúu jnūhun canu. Te cácuu de

nájñūhun quīmī jeē ní sana ichi. Te je íyó túhva nuū neé nuū lúchi jnúú coyūcú de ní cáni.

¹⁴Te jeē ní yáha iñū yucūn Adán, te ni cacu Enoc, te ni nacani de jnūhun jeē ni stéén Yaā Dios nuū de siquī tāca tēe yáha, áchí de: Máá Jitoho yō ni steén yā nuū rī jeē iin quivī te quiji ya jíin cuéhē mil ñayuu maá yá. ¹⁵Te sándaā yā jniñu tāca ñayuu, te snáhnú ndetū yā tāca ñayuu casáha neé. Chi máni jniñu neé cásaha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc. ¹⁶Tāca tēe yáha máni cácahān sōó de, te cácahān de siquī ñayuu. Te máni jeē cúsiī ni maá de cánducú de. Te cácahān de jeē tēe téyí cácuu de, te cácahān yiñūhún de jíin ñayuu návāha nihīn de jecu nuū i.

Jeē stíhvī ni Judas ñayuu cácañdije

¹⁷Te máá ró jijnáhan ró ñánī manī, na núcūhun ni rō jnūhun jeē jé ni canacani tēe cácuu apóstol maá Jitoho yō Jesucristo. ¹⁸Chi ni cacahān de: Nde nuū cuándihī quivī te quijicoo tēe sácatā siquī jnúhun ndaā yā, te sáha de tācā jniñu neé jéē ndíyo ni maá de. Súcuan ni cacastūhún apóstol. ¹⁹Tēe un cúu jeē casásīin ñayuu. Te máni cándihvī ni de tāca jéē cutíndí ni maá de, chi tu ndéé Espíritu yā jíin de.

²⁰Te máá ró ñánī manī, na íje vāha ni rō jíin jnúhun ndoo ndasí jéē cácañdije ró. Te cacān tahú rō jíin fuerza Espíritu Santo. ²¹Te quendōo nihin ró jíin jnúhun jeē cundáhú ni Yaā Dios rohó. Te condetu ró quivī jeē cótecu rō ní cáni sáha máá Jitoho yō Jesucristo siquī jeē cundáhú ni yā rohó.

²²Te sava ñayuu jeē cájeni siquí ni, nducú ró modo scandíje ró i. ²³Te sava ga i chi nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ni rō i jnama ró i, te coto ró máa ró, te cuquini ni rō coto ró nde sahma i jeē ní cujnehén jíin jniñu néé cásáha i.

Jnūhun cújéhnū Yaā Dios níí cáni

²⁴Te Yaā Dios chi máñuhún-ni máa yá cúu Yaā ndichí, Yaā jnáma

yóhó. Te íyó poder yā jeē coto ya rohó jéē ma quívi ró cuéchi, jíin jéē sáha ya jeē cuíñi ró núū ndíndēe yá, te quiví ún coo ndoo ró núū yā, te cusíi ndasí ni rō sáha ya. ²⁵Te na cáhán yō jeē yóhoyo luu cújéhnū ya siquí jeē ni sáha ya jíin Jítóho yō Jesucristo. Te na cáhán yō jeē cujéhnū téyí yá, te ndácu ya jniñu jíin poder jeē ndíso ya nde jenahán ndasí jíin ndé vijna jíin ndé níí cáni. Súcuan na cóo. Amén.